

Crimi turitgais cun finiziun a Sumvitg

■ (anr/vi) **L'emprim cudesch da l'autura Sabina Altermatt sa numna «Verrat in Zürich West». L'istorgia cumenza cun il suicid da Billa Casutt.** Anita Sanchez, ina giuvna polizista ch'è anc en scolaziun, na crai betg che Billa Casutt è sa mazzada. La polizista turitgausa cumenza – davos il dies da ses schef – a far retschertgas. Las retschertgas mainan Sanchez tranter auter en Surselva, l'emprim a la staziun da Versomi.

Là abitescha Corinna Casutt, la sora da Billa. Era Corinna ha bregias da crair che sia sora, ch'era adina uschè segira da sasezza, s'haja prendì la vita. Corinna, ch'era fin uss sa nuspida dad ir a visitar Billa a Turitg, sa renda en la citad. Là empenda ella d'enconuscher la scena da WG's ed il mund dals occupants da chasas.

A Turitg obtegna Corinna tuttenina in tut auter maletg da sia sora. Tranter auter intervegna ella che Billa ha 300 000 francs sin ses conto. Fitg remartgabel per ina dunna che n'ha mai gí ina lavur regulara.

«Verrat in Zürich West» maina

il lectur en ils locals dals «autonoms» sco era en ils biros da la polizia turitgausa. Quests dus differents munds empenda il lectur d'enconuscher entras Corinna, ina Grischuna ch'è darar stada en ina citad, ed entras Anita Sanchez, ina lesba cun ragischs spagnolas.

Las duas protagonistas procuran per ina vista nunsentimentala e nunideologica sin la citad.

Uschebain la politica segirezza turitgausa, sco era il sa deputar intellectual dals sanesters vegn observà cun ina distanza critica.

Vers la fin dal crimi mainan ils fastizis la polizia anc ina giada en il Grischun, sin in mises a Sumvitg. Intginas paucas construcziuns da dialog ha l'autura scrit en rumantsch.

Sabina Altermatt (1966) è creschida si a Cuira. Ella ha studegià scienza politica a Son Gagl. Suen-ter ha ella lavurà tar differentas gasettas a Turitg ed è stada manadra da projects da marketing ed internet. Dapi il 2000 è ella cussegliadra da comunicaziun indipendente.

Questa primavaira ha l'autura scrit durant dudesch emnas il online-crimi «Nervengift» per il «Tages-Anzeiger». Quest crimi, tar il qual era lecturs han pudì influenzer l'andament, è cumparì questa stad en furma da cudesch.



Sabina Altermatt: «Verrat in Zürich West». Chasa editura Orte. 130 paginas. 26 francs. Zelg-Wolfhalden/Turitg 2005.